

Deporte Local

Edwin Roos eligi como Presidente nobo di Comité Olimpico Arubano

ORANJESTAD (AAN) - Diamars ultimo, e Asamblea General di Comité Olimpico Arubano COA, a tuma lugar den e ballroom di Holiday Inn Beach Resort y a eligi un directiva nobo, cu lo dirigi e organizacion pa e proximo cuater aña. Cu participacion di practicamente tur federacion miembro, e directiva saliente a ricibi mandato pa sigui hiba COA padilanti, cu na cabez un Presidente nobo, den persona di Edwin Roos.

A cuminsa e anochi cu un

introduccion di parti di e Presidente saliente di COA, Sr. Roy Mezas, cu a resumi aña 2012 y tur e actividadnan cu a logra realisa. E federacionnan deportivo, miembro di Comité Olimpico Arubano dos biaha pa anja ta reuni den loke ta e Asamblea General. Durante e asamblea di diamars nan a aproba e relato financiero y e relato general di e maneho cu e organizacion a hiba durante aña 2012. Mester bisa cu 22 di e 24 federacionnan afilia na COA ta-

bata presente y den un forma unanime a duna nan aprobacion pa e forma con e directiva actual ta maneha su propio organizacion y e deporte na Aruba. Durante e anochi a intercambia informacion entre e directiva, e diferente comisionnan di COA y e miembronan, esaki semper den un forma positivo.

Prome a presenta e relato financiero (cuenta anual) di 2012. E representante di e partner di COA, e prestigioso compania Ernst & Young, por medio di Sr. Antoine Lobato de Mesquita a presenta e relato financiero di 2012 cu ta muestra un adelanto y un desaroyo positivo pa loke ta e status financiero di Comité Olimpico Arubano.

Secretaria General di COA, Sra. Nicole Hoevertsz a presenta e relato di tur e proyecto y actividadnan cu a wordo realisa durante 2012 y e maneho general cu a wordo

hiba. A resumi e structura interno di e asociacion, e reunionnan cu a tuma lugar, e forma con a comunica cu e miembronan. A presenta informacion tocante e seminaronan y asambleanan na cua a participa den exterior, e resultadonan logra eyan, y tambe e actividadnan cu COA mes a realisa aki na Aruba. Con a logra beneficia di e programanan di Olympic Solidarity a wordo splica. Naturalmente a conta con COA y su miembronan a prepara pa e Weganan Olimpico di London 2012 y e resultadonan cu a logra cu e 4 atletanan cu a participa. Tanto e relato financiero y e relato general a wordo aproba unanimente pa e asamblea, dunando asina e directiva un sosten pa loke a hasi. E anochi a clausura cu eleccion di un directiva nobo pa e periodo 2013-2016. Mayoria funcionario a wordo re-eligi den nan funcion. Solamente pa dos posicion (presidente y 2da secretaria general) mester a tene un votacion, mirando cu pa ambos posicion tabata tin mas cu un candidato.

Prome cu a pasa pa e votacion, a invita e candidato nan pa presenta nan mes na e asamblea, splicando kiko nan plannan ta si nan wordo eligi. Despues a pasa pa e votacion, prome pa e presidente. Resultado di e votacion tabata cu Sr. Edwin Roos a wordo eligi cu mayoria di voto: ela obtene 44 voto, mientras cu

Guaicaipuro Jimenez a ricibi 12 voto. Pa loke ta e puesto di segundo secretaria general, e resultado tabata uno mas sera, mirando cu Juelle Thode a keda eligi riba Miriam Baiz cu un total di 30 voto pa 25. Directiva di COA awor ta consisti di e siguiente personanan:

Presidente: Sr. Edwin Roos
Vicepresidente: Sra. Wanda Broeksema

Secretaria General: Sra. Nicole Hoevertsz

2da Secretaria General: Sra. Juelle Thode

Tesorero: Sr. Jair Tromp


Comisario: Prisca Albertsz

Comisario: Sr. Robert Nieuw

Comisario: Sra. Glenda Croes-Tromp

E cuarto posicion di Comisario ta vacante y pa esaki lo eligi un persona durante e proximo asamblea.

Asamblea a gradici Presidente saliente, Roy Mezas, pa e gran trabou cu ela logra hasi pa COA. E organizacion Comité Olimpico Arubano danki na su liderazgo, a madura hopi durante e ultimo cuater añanan y a conoce un avance sumamente positivo. Cu esaki e asamblea general di Comité Olimpico Arubano a termina na un forma exitoso. Directiva a gradici e federacionnan pa e cooperacion y bon relacion di trabou cu ta existi y cu ta un requisito indispensable pa hiba deporte Arubano mas padilanti.



FOR SALE

Container 45" High cube
aluminium riba chasis

Afl. 4.000,=

CEL: 662-4600